


# NTO MAITHO

## AYA YAAHAATTHUKUWA

### VANO KHUMUSUWELA OWO

 Mwa Ehapari yooreera ya Luka Oowaarya, ni opacerya kapiitulu 24 ni miloko miraru-...eversiiikulu 31, ahiiso kinihimya eversiikulu 30 ya kapiitulu 24.

*Nto vaahiiraneya, okathi vaakilaanthe awe ni yaawo vameesa, nto aahikuxa mukatthe, khureeriha, nuumala aahimeya, khwaavaha.*

*Nto maitho aya yaahaatthukuwa, vano khumusuwela owo; vano owo aahilakaseya wiitho waya.*

*Vano awo yaahileelana yaaworu, Khinoona murim'ahu oniviha mwa hiyo, okathi owo waalavulaawe ni hiyo, mphironi, anitaphulelaka soolempwa?*

<sup>2</sup> Nto Apwiya yaacererye iparakhha Saya. Yoosom'aka yaamukhala, vaakhanle wira kaamwiihana ohiy'ula: *Nto Maitho Aya Yaahaatthukuwa Vano Khumusuwela Owo*. Vano vaaviha, masi kaatthuna wira nvilele voomaala ntoko sinwery'anyu, mwa okathi vakhani paahi, nto miyo kinoophavela waakuva. Masi vano ninthuna niwehe voottittimiha-vo Masu, Masu a Muluku ooreeraxa. Ni hiyo ninvekela wira Muluku, mwa enamuna emosa, otthukule maitho ahu ohiy'ula.

<sup>3</sup> Vakhala wira Paasikha niira n'otthapela paahi yookhumelela y'ehantisi, nto yeeyo paahi, weeso nihaana exariya vakhani yo ohoverya, nihaana exariya vakhani yo okoha, okhala wira aarowa olipihereya vasulu va muupuwelo wa nttittimiho wo okupali paahi nuulumo. Ni Kristu ahaamane anatiri Owo ommanne-awe, weeso hiyo nave, khinaarowa okhalana ekeekhayi nrinaahu.

<sup>4</sup> Masi Pwiya'ahu oottotopeliwa oohimya, okathi Owo aary'awe muumu elapo ya vathi, "Woohala okathi vakhani, nto olumwenku khunrowa-tho okoona." Vano nuulumo nlo *olumwenku* vo, ninkhuma mwa "enamuna ya olumwenku, atthu a elapo ya vathi." "Olumwenku khunrowa-tho okoona. Nave nyuwo munookoona, maana Miyo kinookhala ni nyuwo, hata mwa nyuwo, mpakha omala olumwenku." Vano, Masu awo t'ekeekhaixa ntoko khula Masu makina hiyo nilavunly'ahu mwa esumana yeela, mBibiliani, oolikana vekeekhai ntoko Masu makina mBibiliani. "Woohala okathi vakhani, nto olumwenku

khunrowa-tho okoona. Awo kharowa okhalana maitho aya ootthukuwa.” Aakhala atthu ayariwe molumwenkuni, kahi n’utthuna wa Muluku, masi mwaha w’othanla waya wo wiiphenta yahaarowa omwaamini Owo vaakhanle wira Owo eemenle va alavulaka ni nyuwo ohiy’ula. Ti yooriipiha murima ohimya, masi Bibilia ohimye wira, “Awo ayareliwe molumwenkuni mu, ehukumu yeela,” Yuta, ni ntoko versiikulu 3.

<sup>5</sup> Vano, masi wa nyuwo, ohiy’ula, mukhumme ni mweemenle mapuro othene mpaani mu, ni munthukumana vamosa empa yaamukhaani mooviha ntoko ela, khimurweenle wira mooniwe paahi. Nyuwo murweenle niwoko nimoso. Nto, mwa wupuwela waka, nyuwo murwiye n’ixariya ya murim’anyu, wira mweetteke vakhiviruxa ni Muluku, wira mukhume va, ohiy’ula, mutthu oolokaxa ovikana saary’anyu okathi nvolonwe anyu. Ti yeeyo kivekenly’aka okathi kivolonwe aka vamukhora, ohiy’ula, “Pwiya, mukikhalihe mutthu oolokaxa okathi onikhumaaka, ohiy’ula, ovikana siry’aka kivolowaka.” Vano okathi Owo . . .

<sup>6</sup> Owo ohinatthi orowa, Owo aahihimya moolumo a enamuna yeela. Owo iirale, “Ole onikaamini Miyo . . .” Yohani Oowaarya, kapiitulu 14, versiikulu 7. “Ole onikaamini Miyo, miteko sinvar’aka nave-tho owo onoovara; soovikana iya owo onoovara, maana Miyo kinrowa w’Atithi Aka. Miyo kinoorowa, ni kinimoorwa-tho.”

<sup>7</sup> Vano ninoophwanya miteko Owo sivanryaawe. Miteko Owo saavaraawe? Owo khaahimya wira aari mutthu muulupale, Owo aari Mutthu oowiiyeviha paahi. Owo khaalavula ni moolumo orattela, Owo aalavula paahi ntoko Mutthu pure. Owo aakhala eriyari y’anamuhaawi, “akhwatte yaahikhalana mittupha, ni axipalame yaahikhalana ipuru, masi Owo khaarina nipuro wira ahele muru Awe.” Owo aarina nlaya nimoso, aavahiwaawe, “naari nootthanvwa nothene, noohittotthiwa mwa nenlo.”

<sup>8</sup> Mwaha wa yeeyo awo yaaxerenryaaya ehako. Yaari mwaha wa xeeni yeeyo? Okhala wira yoolaleiwa y’eprofeta ya Waataana Wa Khalayi yaahaana omaliheriwa, “Awo aakawanya ikuwo Saka, ahaaxererya ehako soowara Saka.” Tivo awo khiyaawerya okawana mwa ottotthiwa, yaahaana waaxererya ehako, nto eyo yaari wira emaliherye y’eprofeta ya Waataana wa Khalayi.

<sup>9</sup> Masi ninooweha, okathi vakhani paahi, Owo iirale exeeni? Ni miyo kookupali, ohiy’ula, wira etala ya khula mmosa wa mirima sahu, okhuma mwaamukhaanixa mpakha muulupalexa, ohiy’ula, omoona Yesu Kristu. P’utthuna va murima aka. Nto ekhalenleni siiso? Hiyo nahimyaruru ni Soolempwa . . .

<sup>10</sup> Araatiyu anoolaleerya eyo olelo, itelevisawu sinnihela mprokaraamani, iteyaaturu soohimya, wira, “Owo khonkhanle va, masi Owo oohihimuwa!”

<sup>11</sup> Ahe, nto, vakhala wira Owo oohihimuwa, Bibilia oohimya, mwa aHeperi 13:8, “Owo mmosaru nsana, olelo, ni mahiku othene.” Vano, va ti vatthu vary’aya, mwaatthu. Eyo Ekeekhai, ahiiso kehiyo Ekeekhai. Eyo, eyo yaahikhale Ekeekhai, weeso Bibilia t’owootha, vano nto Masu t’owootha; vano nto hiyo noopweteya, ni khokhanle ohihimuwa w’alipa-ookhwa, ni hiyo ninaamini-voowiipaka. Masi yakhala Ekeekhai, vano Awo ahaana wiilipiherya Mmansaya.

<sup>12</sup> Nyuwo mwahimyaruru wira maasi ala t’onaana, miyo nkinatoko woona maasi khalayi, nyuwo mwakiitthela, vano khuhikhala oonaana, weeso awinyu—moolumo anyu kahi eekeekhai, masi mwakiitthela, vano awo khukhala oonaana, nto moolumo anyu t’eekeekhai.

<sup>13</sup> Vakhala wira Kristu mmosaru nsana, olelo, ni mahiku othene, weeso Bibilia t’eekeekhai. Vakhala wira Owo kahiyo mmosaru nsana, olelo, ni mahiku othene, weeso Owo kahiyo eekeekhai. Vakhala wira Masu a Muluku kahi eekeekhai, weeso Kristu kahiyo eekeekhai. Vano, vakhala wira Masu a Muluku kahiyo eekeekhai, Muluku kahiyo eekeekhai. Masi, nto, vakhala wira Masu a Muluku t’eekeekhai, weeso Bibilia t’eekeekhai, Muluku t’eekeekhai, Kristu t’eekeekhai, ni hiyo naahaana okhala oororomeleya wa Niwoko naya. Voolikana!

<sup>14</sup> Vano, okathi Owo aary’awe elapo ya vathi, Owo khaahimya okhala mpenuxa muulupale. Akavi ansuwela wira Mwaana a Muluku khonahimyeke wira aari mpenuxa? Vekeekhai voolikana. Owo iirale, “Miyo nkinwerya wira hat’etthu Mmansaka, masi ele eniwoonaaka Atithi yiraka. Nkihiyo Miyo kinvara miteko,” Owo aahimya wira, “t’Atithi ankhala mwa Miyo. Awo t’anvara miteko.” Miteko xeeni Owo aavaraawe?

<sup>15</sup> Ninniphwanya mBibiliani, vaavo mutthu mmosa aahaniwa Filipe ooponwe-awe. Vano owo khurawa khumphwanya mpatthani, Natanayeli, ottaiwene, ikilomo miloko mixexe ni thanu na tthaaru okerekhere wa mwaako. Owo aahimuruuhatu wa Yesu. Nto okathi omphwany’awe, owo aari mukhitte mwa mwiri, avekelaka. Nto owo khwira, “Murwe, mmoone Ole omphwany’ahu: Yesu a oNasareti, mwaana a Yosefe.”

Owo khwira, “Wookhala wookhumelela-wo etthu yooreera oNasareti?”

Owo khwira, “Murwe moone.”

<sup>16</sup> Eyo ti eyooniheryo yoomalela oreera kinsuwel’aka. Muhikuxe nuulumo na mutthu mukina wa Yeeyo. Murwe, moone mmansinyu! Khwira, “Murwe moone.”

<sup>17</sup> Nto okathi owo orwiiyaawe, Yesu eemenle muliinyani, alakela aavekelelaka atthu. Nto Filipe varwiiyaawe, ni Natanayeli, Yesu khwira, “Ola va mwIsarayeli, mwa yoola khuuvo-vo wootha!”

18 Owo khwira, “Nyuwo mukisuwenle liini, Rabbi?” Eyo yaahimutikiniha. “Nyuwo mukisuwenle woowi?”

19 Owo khwira, “Filipe ahinatthi owiihanani, okathi waaryanyu mukhitte mwa mwiri, Miyo kaahiwoonani.” Ikilomo miloko mixexe ni thanu na tthaaru, mukerekhere wa mwaako, nave, “Miyo kaahiwoonani.”

20 Eyo yaahooniherya wira Owo aari pani. Owo aari Muluku onkhala mapuro othene; kahi profeta paahi, masi Muluku Mwaneene oowiisooniherya mw’erutthuni. Mwaha wa yeeyo Owo aawery’awe ovaha ekumi Awe, n’ukuxa-tho.

21 Mwamuthiyana mmosa aahikhuma orika maasi nihiku nimosa. Nto Owo khulavula ni yoowo, khwira, “Muthiyana, mukiruuhele maasi!”

22 Owo khwira, “Khanilimalenle nyuwo aYuta onivekela hiyo, aSamariya, etthu iyo. Khaniniiwanana mmosa ni mukhw’awe.”

23 Owo khwira, “Masi mwaamusuwenle Ole onlavulan’anyu, mwaamukivekela Miyo maasi. Miyo kaamooruuhelani Maasi muhinrowaanyu orwa va orika.”

24 Nto owo khwira, “Ehimye ti yoowiixa saana, Mulopwana. Nyuwo khamurina hat’etthu yo orika-no, ni Nyuwo mwaarow’anyu owerya ophwanya Maasi ala.”

25 Owo aaira exeeni? Aathokosa erooho awe. Nto okathi Owo ophwany’awe ole waari mulattu awe, mulattu awe waari okhala wira owo aakhala mooraruwani. Owo aahikhalana axiyya athanu, ni aakhala ni aneethanu na mmosa.

Nto Yesu khumwiirela, “Murowe, mwaaruuhe aiy’anyu, murwaase va.”

Nto owo khwira, “Miyo nkirina aiy’aka.”

26 Owo khwira, “Nnari, nyuwo mwaahikhalana athanu, nto ole munkhalan’anyu vano kahiyo awinyu. Vano, moohimya saana.”

27 Nkawehani vano, muYuta. Okathi Yesu ompakenlyaawe mwiiriirya ole, muYuta ole eekeekhai oororomeleya, eekeekhai, muYuta eekeekhai, iirale, “Nyuwo mwa Mwaana a Muluku, Mwene a Isarayeli.” Owo aahisuwela wira ithoonyeryo iye saahaana omuthhara Mesiya.

28 Nto vano va ori muSamariya. Okathi oireliwaawe mwiiriirya ole, owo iirale, “Napwiya, kinoona wira Nyuwo mwa Profeta. Hiyo noosuwela wira Mesiya arwa vale, Owo noonileela itthu iya. Masi Nyuwo mw’Ani?”

Owo khwira, “Ti Miyo kinlavula ni nyuwo.”

29 Owo aahihiya muno awe, khutthimakela opooma, nto khwira, “Murwe, mmoone Mulopwana mmosa Yoowo okihimeenrye itthu kiiraly’aka. Kahi yoola Mesiya ene?” Vekeekhai.

<sup>30</sup> Mwa Soolempwa hiyo namuwerya wona, moota Owo siiraly'awe itthu Atithi yaamoonihaaya. Bibilia oohimya, mwa Yohani Oowaarya, okathi yaamukonhe aya Owo mwaha wa xeeni Owo ahaavonihenryaawe atthu ale othene oorakala, vano Owo iirale, "Vekeekhayi, vekeekhayi, kinooleelani wira." Yohani Oowaarya 5:19, "Vekeekhayi, vekeekhayi, kinooleelani wira, Mwaana khanwerya wira etthu Meekh'awe; masi ele Owo oniwoon'awe Atithi yiraka, Mwaana onniira."

<sup>31</sup> Vano, vakhala wira Kristu oohihimuwa mw'alipa-ookhwa, ni ori eriyari ahu olelo, ni oohimya wira itthu imosaru Owo siiraly'awe, wira hiyo naamwiira nave, eyo ti Ekeekhai, ahiiso kehiyo Ekeekhai. Bibilia ohimye wira, "Owo mmosaru nsana, olelo, ni mahiku othene."

<sup>32</sup> Nto, apatthani, miyo kootteeliwa murima osuwela, olelo, wira vekeekhai miyo, ni sothene siri mwa miyo, kinnaamini wira Yesu Kristu ti Mwaana a Muluku. Owo aarupaliwe ni aayariwe, eyareliwo yooreeraxa. Owo aahihaawa vathi va Ponsio Pilato; khukhomeliwa vamwiikimanyo, aahivithiwa, khuhihimuwa mmurotoni mwaya; ni khuwela Wirimu, nto okilaanthe moon woolopwana wa Omwene Awe. Vano Erooho Yoowaarya eri va ekelelihaka ohoolo muteko mmosaru Owo aavaraawe okathi waary'awe muumu elapo ya vathi. Muupuwelo xeeni wooreera!

<sup>33</sup> Voosiisu xeeni wooreera, voosiisu woopacerya wa ohihimuwa, Paasikha oopacerya aatonko oxa elapo ya vathi! Nyuwo munnisuwela wira Paasikha ola hiyo ommutthapelaahu, a ohihimuwa Wawe, onimuthoonya paahi Paasikha muulupale onrwa, okathi Owo onrwaawe okhuma Wirimu? Nto othene ale akhwiye mwa Kristu anoohihimuwa erowe ni Yoowo. Hiyo nimmuwehererya paahi Paasikha yoowo, muulupale, onrwa. Nto, olelo, moota eryaaya yooreera, ekurunuxelo murima xeeni, eyooniheryo xeeni nrinaahu, okathi Bibilia onihimyaawe, okathi okhala Wawe mapuro othene onihimyaaya, okathi Owerya Wawe wo ovoniha onihimyaaya, okathi Erooho Awe yuulupale enihimyaaya, okathi itthu sothene mwa ephattu sinihimyaaya, Ekereja Awe enihimyaaya, murim'aka onihimyaaya, khula murima wa mutthu oyariwe vasya onnihimya, wira, "Yesu Kristu ti Mwaana a Muluku, ni onimoorwa-tho! Ni Owo mmosaru vano, 'Nsana, olelo, ni mahiku othene!'" Vano nwehe.

<sup>34</sup> Waari voosiisu yoola wooreera wa Paasikha. Yaahikhala mawoowo manci-ene, soolavula. Athiyana kamosa-kamosa yaahitthika ekhumaka omahiye, khwira wira yaahoono yoowoona ya Malaikha. Ni awo yuupuwela wira aari mulipaeematta; Maria, maama, maana owo aahiwa nsu olavula ottuli wawe, nto khwira, "Munimphavela pani?" Nto okathi Owo orukunuw'awe...

<sup>35</sup> Owo khurukunuwa, khwira, "Awo arimwaakuxa Apwiya aka. Miyo nkiwuwenle vaixaathiwaaya-vo. Nyuwo

mwaasuwenle-ene, mukileele Owo varyaawe-vo, miyo kirowe kamukuxe.”

Owo khurukunuwa, khwira, “Maria.”

<sup>36</sup> Vano owo khunweha, nto owo khwira, “Raponi,” enihimya wira, “Mwiixuttihi!”

<sup>37</sup> Owo khwira, “Muhikivare, okhala wira nlelo nkinawe. Masi kinrowa w’Atithi anyu, ni Atithi Aka, wa Muluku Aka, ni wa Muluku anyu. Masi rowakani, mwaaleele awiixutti Aka wira kinimwaaphwanya oKalileya.”

<sup>38</sup> Moota yaakhal’aya ntoko ethiru, ya Mulopwan’ola awo yaamoonaly’aya ottikittheliwe murette; khukhwa, khuvithiwa, nto nla naari nihiku naneexexe, ahiiso nihiku naneeraru okhuma okathi Owo aakhwiyaawe. Petru aahivolola, ni aathuna orowa otho ihopa. Anli aya yaahimye wira, mmosa aihaniwa Keleofa, khwira, “Ninrowa otthikela owaani, oYerusalemu.” Nto erowasaka siiso, yeettaka, voosiisu ule, okathi Petru aakunxaawe mukhoyi awe wo omiserya khurowa omiserya, ala anli yaarisa mphironi, ooxanka. Nto erowaka mphironi, yiiraka, “Ahe, kinoona wira ekumi kherina maana. Oh, moota naaminni ahu wira Owo aari Mesiya! Aawerya sayi Mulopwan’ole, aahihimuxa alipa-ookhwa, okhalakhala omuhiyaka mukhulupale ole a anamukuttho omunyemulasa Owo? Aawerya sayi Mulopwan’ole, aawerya wona yoowoona vasulu va yoowoona, okhalakhala amuhiyaka nakhotto muRooma omuhela ntapwatta wiitho Wawe, ni ommana Owo vamuru, ni wira, ‘Mwaari profeta, munleele oomanneni?’ Vaaweryaneya sayi Owo ovekela omoreliwa ikharari, vamwiikimanyo, woonaka wira Owo aaniwerya hata waahihimuxa alipa-ookhwa?” Oh, waari okathi wo woceiha!

<sup>39</sup> Nto okathi ule wo woceiha onnimurweela khula mulipa-oowaamini, wira owehereryeni, ni owootolani, ni wira woone vakhala wira tthiri munnaamini. “Khula mwaana onrwa wa Muluku, ohaana toko wehereriwa, oxuttihiwa ntoko mwaana.”

<sup>40</sup> Anookhala akina a nyuwo va ohiy’ula, vekeekhai, anrowa ovira mowehereriwani siiso. Naaitthana eliinya ya mavekelo, miyo nkinuupuwelela taani orina ittikitti sa mavekelo, khaavo hata mukina onsuwela; iyo sothene sirotakanxiwa vamosa, khuvahiwa nyuwo. Kinimwiihana okhuma nipuro nlo, khula nipuro nri mmuruni mwaka okathi uwo. Hiyo khaninwerya okhalana woohikhala vakhani khula okathi. Ituusiya piili, khino, anoovira muliinyani mwa mavekelo. Othene antthuna orwa. Nyuwo pooti wuupuwela wira Owo ohoovirani, masi kahi siiso. Owo onoowehereryani paahi, wira oone paahi vakhala wira tthiri munoomwaamini Owo. Yoowoona khenivoniha; yoowoona enlipiherya paahi Mukhalelo Awe.

<sup>41</sup> Miyo kaakilaanthe va paahi, kiwehaka naanaano va vamuthukumanoni. Ni kinnimoona m—mpatthani aka, Muhano

Cox, onikhuma oKentucky. Aahikhalana kankuru muulupale wiitho wawe, isumana vakhani sivinre, aamukhuunre vaniithoni vawe. Owo aamookhwa. Muhano Wood, mpatthani aka ooreera murima, khukiihana mutelefoonini, nto aamunla, khwira, “Kookupali wira onoorowa okhuura niitho na maama, mahiku vakhani.” Meetiku khupacerya omweettiherya ni muthinto mmosa wa etthu, nto khummwarya. Aari mwa mukhalelo mmosa woowoopiha. Khurowa khuvahererya nivekelo n’eekekhai, naamukhaani, ni waamini woolipihiwa ni nankura, wira yaamwiiraneya. Nto va owo okilaanthe va ohiy’ula, oolikana saana ni mukumi; hata nlepa nimosa na yoowo khanikhanle, oovona voolikana, owiitho wawe. Okilaanthe va ohoolo wahu. Akina iwo, n’itthu emosaru. Mwaha wa xeeni? Okhala wira Yesu Kristu oohihimuwa mw’alipa-ookhwa, ni Owo mukumii.

<sup>42</sup> Mmosaru yoowo aawerya omukwannya namaretta, ni wira, “Miyo kinnitthuna, nvone,” onniwerya omukwannya kankuru ni wira, “Miyo kinnitthuna, nvone,” vakhala wira Owo mmosaru nsana, olelo, ni mahiku othene.

<sup>43</sup> Nto okathi Keleofa n’akina yeettaaya erowasaka, oowoocaya, waari ntoko mmosa wa voosiisu iye sooxankiha, ekhalaka ntoko itthu sothene saarowa vohiloka. Naanaanoru, Mutthu mmosa khurwa, Owo aarwa ottuli waya, khwaattamela khwaaphwanya. Nto hata khiyaasuwela wira ole aari Pwiya Yesu! Owo aari mukumi, ni atthu anci-ene yamphenta Owo khayaasuwela eyo.

<sup>44</sup> Nto ti siiso siry’aya olelo. Aakhala atthu anci-ene olelo anaaphenta Apwiya, nave khansuwela. Mwaamuwerya waahimeerya yeeyo, nave nnakhala vo awo khanwerya osuwela wira Owo mukumi mahiku othene, ohiy’ula, wira Owo ori vaava mukereja mu ohiy’ula, wira Owo ori eriyari ahu, ni onookhala mpakha Owo orwa mw’erutthuni, y’ethayi. “Miyo nkinoohiyani nnakhala woonyanyalani.”

<sup>45</sup> Nto okathi wiiraaya erowaka khupacerya olavula mphironi, Yesu, kintthuna wira nwehe etthu yoopacerya Yesu iiralyaawe, naanaanoru aakenle mwa Soolempwa, Owo khwira, “Oh, oohikhalana akhili mmurimani, ti yoorika nyuwo waamini ele maprofeta yahimmy’aya?” Maana, Owo aammalaru waakoha, “Muxankale-ni?”

<sup>46</sup> Nto awo khwira, “Nyuwo paahi muri muletto? Khamunsuwela wira Yesu a oNasareti, Yoowo hiyo nuupuwelaahu wira taari Mesiya, Nvuluxa wa Isarayeli, Nyuwo khamunsuwela wira nla ti nihiku na neeraru okhuma okathi Owo okhomeliwaawe vamwiikimanyo? Ni Owo aari Mutthu oowerya mwa Masu. Owo aari Profeta oowerya, okhala wira miiriirya sinci-ene n’itthu siiso, Muluku aapaka mwa Yoowo. Nto nla nihiku na neeraru; nto vano awo aamwiiva Owo, khunvitha, nto Owo aari mmahiye. Nave athiyana akina ahoorwa wa hiyo khunihimeerya wira Owo oohihimuwa mw’alipa-ookhwa.

Ni hiyo noosuwela wira yaari ethiru paahi yoolosowa, vano ninoorowa nitthikaka.”

47 Nto owo p’ukathi Owo opaceny’awe otthukula Masu. Oh, miyo okisivela Masu a Muluku Ahinimala! Owo khupacerya ovira mwa Soolempwa, opacerya ni Moise. Owo khaahin’ye hat’ethu yoohitthukuliwa, Owo aakenle olukamaka Masu!

48 Khula mutthu oorummwa ni Muluku, nkincala wira ti pani, owo onookhala ni Masu a Muluku. Owo aahiire, kahiyo murumeyi eekeekhai a Muluku.

49 Owo aalukamme Masu. Ni Owo khooniherya, ni Masu, wira Kristu aahaana okhwa, ohihimuwa, ni okela Movuwani Mwawe. Vano, oh, yaahaana wira elavunle!

50 Miyo waamukisivela kaakhalanne iwoora seiyo vakhani olavula ni Yoowo (ankhi nyuwo?) mphironi. Nyuwo muniira, “Ahe, Munna Branham, miyo vekeekhai yaamukisivela. Miyo kaamutthuna.” Vano, hiyo ninoowerya okhalana naanaano va. Owo ti Yoowo onlavula ni nyuwo, mmurimani mwanyu. Nyuwo munoohisuwela paahi.

51 Vano nwehe okathi Owo waakhuvelaawe opooma, waahipacerya wiila, Owo aahiikhaliha ntoko aarowa ottaiwene.

52 Owo pooti owiirelani yeeyo, nave. Owo pooti owuupuwelihani wira Owo onrowa ottaiwene, masi Owo khonrowa. Owo khonrowa ottaiwene. Owo ontthuna paahi wira mmulattule.

53 Vano awo khumwiirela, “Oh, vahanle wiila. Vano muhivikane, masi xontte murwe mukhale ni hiyo.” Nyuwo mmulattule Owo siiso paahi, moone enrowa okhumelela. Khwira, “Vahanle wiila vano, Nyuwo murwe mukhale ni hiyo. Vahanle wiila.” Vano Owo khurukunuwa khuvolowa, murestantante, empa yaamukhaani y’omaka.

Europa nlelo yookhalaniwa. Nyuwo munimoolya ni orupa, nto itthu sothene sinlinvwa ekontha emosa, oteeli anyu.

54 Nto okathi Owo ovolonwaawe ni yaawo! Va eri epantte yooreera. Nihiku nle nothene, okathi awo yaalavul’aya ni Owo, Owo khaahimye hata ethu emosa. Anaamwi, awo yeettale ni Yoowo khulavula ni Yoowo, khalayi, masi awo khayaasuwenle.

55 T’ani aawaakihenryeni nyuwo okhalana ehasara ele nihiku nle? T’ani aamukhalinhe mwaan’ole mukumi? T’ani oolivenryeni ekontha ele ya yoolya? Aari Yoowo, masi nyuwo khamunsuwela tu. T’ani oovanheni ekumi nyuwo wira murwe okereja ohiy’ula? Ti Yoowo, masi nyuwo khamunsuwela. Oh, vaakhanle wira naamuwerya wira paahi ntoko yaawo, omulattula paahi wira Owo orwe!

56 Nto okathi Owo okenly’awe, khuvolowa mpa, khuwala mikhora, vano Owo aahiira ethu hata mutthu mukina ahaawerya wira siiso. Owo aari Mmosa paahi aawerya wira,



okhala wira awo yaahikhala ni Yoowo ohinatthi okhomeliwa Wawe vamwiikimanyo. Nto Owo aakunxe mukatthe ole, nto, siiso ntoko Owo siiraly'awe, eyo yaari enamuna Awe yo wira. Vano maitho aya khukhala ootthukuwa, ni khusuwela wira vaaweryaneya paahi okhala Yoowo. Owo khapinse ni yaawo okathi munci-ene. Owo aahilakaseya wiitho waya, okathi vakhani paahi. [Munna Branham oruminhe ikatha sawe—Mol.]

<sup>57</sup> Nto erowasaka, awo yaahitthika yaakuvaka ntoko saaweryaaya, ni inawu sooveya, ekhuwelaka paahi oxintta, waahimeerya wira, "Apwiya aahihimuwa tthiri!" Awo khiyaatthikanse wira yanyakulihane etiini aya. Awo khiyaatthikanse wira yaakhulane mwaha wa Yeeyo. Masi awo yaasuwela paahi wira Owo aahihimuwa mw'alipa-ookhwa!

<sup>58</sup> Vano, apatthani, vakhala wira Yesu Kristu, Mwaana mukumi a Muluku, numala miyaakha imiya thanu na xexe sivinre, vakhala wira Bibilia t'ekeekhai, Owo ohimnye wira, "Miyo kinikhala wa mahiku othene," Owo mukumixa va, mpaani mu ohiy'ula, ntoko Owo saary'awe nihiku n'ohihimuwa Wawe, Owo ori mw'erutthuni paahi.

<sup>59</sup> Akina w'awo yaathukumanne vamosa. Nto Owo khuvira muxirini, khukhumelela, eriyari aya, khwira, "Va, kikwanyeni. Nkawehani mirahu Saka mmatatani Mwaka. Erooho yookhalana erutthu ni makhuva ntoko Miyo sirin'aka?" Owo khwira, "Mukivahe etthu kilye." Nto awo khunvaha Owo ehopa ni mukatthe. Nto Owo khweemela vale khulya, ohoolo waya, khwira, "Erooho khenlya ntoko munikoonaanyu Miyo kilyaaka."

<sup>60</sup> Exeeni Owo? Owo ti Yehova Muluku ole, muulupale mukumi ori eriyari ahu ohiy'ula. Owo ori eriyari ya mapuro othene aili wala araru anthukuman'aya: "Miyo kinookhala eriyari aya."

<sup>61</sup> Nto vano va t'ile kinuupuwel'aka. Kristu arwaaru voowiriyani va w'atthu, nyuwo nviheriwaka, nwehereryaka, ni wooniherya, mwa Paasikha ola, wira Owo mukumi, ni omphwanyaneya mpaani mu ohiy'ula, vano muhaana ehaakhi yo onvekela Owo etthu p'itthu Owo okhwenly'awe, ni waamini wira munimwaakhela. Munnaamini wira eyo Ekeekhai? Vekeekhai, ti yeeyo.

<sup>62</sup> Vano, kaamuwerya olavula ni nyuwo okathi munci-ene, masi Nuulumo nimosa ninkhuma wa Kristu ninoohimya vanci-enexa ovikana moolumo othene kaakhanly'aka olavulaka; ookhulumuwa ene ni oovolola mwa nsu, ni oowooceya ntoko siryaaya mwa nsu.

<sup>63</sup> Vano nto etthu ekina, moolavulani. Ti yoolipa, maana nno owannyaka, okhalana muthukumano wa mureerelo ni mureeriho wa Erooho siisaale. Mwaha wa xeeni? Okhala wira nno owannyaka. Yesu ohimnye wira, "Profeta, owannyawe,

elapo awe, hata elapo awe ene.” Eyo etthu emosa paahi eniiraneya siiso.

64 Awo yaahimya wira okathi Owo oronwaawe owanny’Awe, awo yiirale, “Kahi yoola mwaana a kalapinteero? Ame Awe kahiyo, Maria, nno ni hiyo? Axinna Awe othene khari wenna, ni axirokor’Awe? Hiyo khinnaasuwela? Owo okhumme exikola xeeni? Eseminaariyu xeeni Owo omalinhaawe-wo osoma? Ipaphelo xeeni sa mweemereryo Owo oneettanaawe?” Ni Owo khaarwiiye akhumaka hata exikola wala hata eseminaariyu, wala hata ipaphelo sa mweemereryo, masi Owo aakhumme wa Muluku. Masi awo khiyaawerya woona eyo. Awo khwira, “Owo omphwanya vayi osuwela nno?”

65 Nto okathi yaamoonaaaya Owo olamula miyuupuwelo iye sa atthu, okathi Petru oruuly’awe wa Yoowo, Owo khwira, “Nsina nanyu mwa Simoni, nsina n’atithi anyu ti Yona,” eyo yaahimututuxa. Owo aamusuwenle sayi?

66 Afarisi yeemenleene vaavale, khwira, “Owo ti Pelizepuli. Owo mukhulupale a anahako. Owo xetwani!”

67 Nto Yesu khwira, “Nyuwu munihimya eyo mukivirikanyaka Miyo, Mwaana a mutthu, munooleveliwa. Masi okathi Erooho Yoowaarya enrwa’aya wira etthu emosaru, vano nyuwu munalavula nuulumo nimosa noovirikanya Yeeyo, khimunkhalakhala muleveliwa, olumwenku ula wala olumwenku onrwa.” Tivo, eyo etthu yoowoopiha. Vano Owo aasuwenle sayi? Owo aahimenrye-ni yeeyo? Owo aanisuwela wira ithoonyeryo iye saammala mpakha nihiku nla nookiserya.

68 Nto mahiku ala ookiserya, Owo khaarowa okhala naxariya, waamwaraxela oviruwa Wawe atthu anaxariya. Awo arina... Hiyo noophimmwa vapalansani, khuphwanyiwa nihaleelaka. Sothene sinuupuwelaahu onkhala oviriha okathi woothweela, aporokaraama a muraatiyuni, oohikhoottiwa, Elvis Presley, Arthur Godfrey, iperwa soonanara, araatiyu ni itelevisawu soosareya seiyo. Hiyo ninkhala owaani Namararu ohiyu, wa muthukumano wa mavekelo, wira noone ethiru ntoko eyo, ni wiisiihana aKristu?

69 Vano Muluku aamwaraxaka Erooho Awe, ni wooniherya ithoonyeryo sa ohihimuwa Wawe, hiyo ninimuulumela Eyo ni orukunuwa. Nto eyo etampi ehinleveleleya, wira yeeyo. Yesu ohimye wira, “Mulavule nuulumo nimosa nooveeha Yeeyo, khenkhalakhala eleveleliwaka, olumwenku ula wala olumwenku onrwa.” Tivo Erooho eyo ehaana orwa mahiku ala ookiserya, wira elipiherye wira Masu awo a Muluku t’ekeekhai.

70 Nto miyo kinihimya wira, vathi va owerya wa Masu a Muluku, ni moonelo wa munep’aka: Erooho Yoowaarya yeeyo emosaru (Erooho) eri vaava naanaano va eriyari y’atthu ala. Vano, koohimya wira Owo oohihimuwa mw’alipa-ookhwa. Miyo koohimya wira Owo mukumii, onikhala voohimala.

Koohimya wira Owo mmosaru nsana, olelo, ni mahiku othene; mmosaru mwa nikano, mmosaru mwa Owerya; mmosaru mwa sothene, sothene ohiya Erutthu Awe y'ethayi ekilaanthe moonoo woolopwana wa Muluku ni Omwene, Movuwani. Masi Erooho Yoowaarya eri vaava, evaraka muteko, yeetteetaka, epakaka, yiiraka voolikana ntoko Yesu Kristu siiraly'awe, maana eyo t'ikeekhayi yo ohihimuwa Wawe. Okathi xeeni wooreera! Vano miyo kinoona wira nyuwo munnoona vary'aka.

<sup>71</sup> Vano, kahi n'ala vakhani, atthu oophiyaka emiya, wala atthu imiya piili va mu—mpaani mu yaamukhaani, oophunyana va ohiy'ula, masi koohimya nuulumo nlo ohoolo wa ikonto imaara ikonto sene, ni ikonto imiya sene, kinvarenle-ene Bibilia ntata nimoso, ni Ekurani nikina, wira, “mmosa ookhalana exariya, nto mukina aya t'ovonya,” ni omutharimula khula namukuttho Mmaka wira orwe ooniherye, wala mukina, Buda, wala onakhaleru pani, voovirikanya Ekurani, ni voovirikanya etiini aya, masi atthu othene khukhala oomaala.

<sup>72</sup> Masi, axinna, etthu eniirelaaka yeeyo, okhala wira miyo koosuwela wira Nvuluxa aka ookhala! Ni Owo ti Ekeekhai. Yesu Kristu mukumii. Owo ori vaava!

<sup>73</sup> Vano kehiyo hat'etthu mwa miyo kaakhanlyaaka wiiraka, ti yoovaha ya Muluku. “Muniira sayi?” Onkhala wiivahererya paahi.

<sup>74</sup> Mpaani muumu vano aakhala manci-ene, Malaikha manci-ene. Nyuwo muniira, “Eyo ti Yoolempwa?” Owo ti Bibilia. Mukihiye kiwooniheryeni. aKristu akavi ari mu? Nvenxe ntata nanyu. Vaareera, nyuwo pooti olepa. Bibilia ohimye wira, “Malaikha a Muluku ankhala vakhiviru w'ale aniwoova Yoowo.” Vano, aakhala Malaikha va!

<sup>75</sup> Vano Kristu ohimye wira, “Vanthukuman'aya aili wala araru mwa Nsina Naka, Miyo kinookhala eriyari aya.” Vano, Owo ori vaava! Etthu ene okhala wira, nyuwo khamunwerya omoona Owo, masi mwaha wo waamini hiyo ninnaamini.

<sup>76</sup> Miyo kinoowerya owooniheryani wira raatiyu onivira vaava, nave, masu. Miyo kinoowerya owooniheryani wira ilarataro sinvira vaava. Khasinvara mpompe *ola* va; khenvara mpompe *ola*, ekristale ela, vamiikoroni va; ni nakhala khenrowa orwa vanipattuusani *va* na ekaruma, okhala wira khepakawe siiso. Masi nookhala nipattusana na ekaruma enrowa okumiherya elatarato eyo.

<sup>77</sup> Vano Muluku ohaahela akina Mukereja, arummwa toko, nto maprofeta, awiixuttihi, anamalaleya ehapari, ni amukukhula, othene wira alikanyiherye Ekereja. Naarowa owerya sayi omukhootta mmosa, ni ohimya wira mukina kahiyo siiso? Muluku t'oniira, Mwaneene. Kehiyo hat'etthu molumwenkuni masi wiivahererya paahi mmansinyu wa Erooho Yoowaarya. Nto Erooho Yoowaarya enimweetiherya okhuma vaavo, nto nyuwo

khamunsuwela etthu eniiraanyu. Owo muteko w'omeekha wa Erooho Yoowaarya.

<sup>78</sup> Vano, apatthani, mmuttettheni mwaka. Ni kintthuna kihimye ela vano, kihinatthi omaliha muhakalaliho ola. Nihiku nlo khenrowa okhala hata ettuurwa enrowa ohala oJeffersonville, khenrowa okhala hata emosa enihala oCharlestown, khenrowa ohala hata emosa oLouisville. Olumwenku ula ti woolikana wira ohukhummwe. Awo aakhalana musika wa itroxeeniyu naanaano wa Ruusiya onweryaawe woopa okhuma oMoskoovu, omoroxela Ephiro ya Neexexe, ni wiiseela khula emosa wa ikaafirika iya sa oka nno, n'upwiniha imeeturu miloko miili ni tthaaru vathi v'etthaya, ni musika mmosa. Musika mmosa; ikilomo miloko miili ni xexe, enoophiya imeeturu miloko mixexe ni thanu na mosa vathi. Ntata niri vesyaloni. Eroroco enimweetta. Vahooxa vahinuupuwelelaanyu. Xeeni olipelelaka mpakha okathi yoowo?

<sup>79</sup> Muupuwele, "Emp'ela ya vathi va yakurumuwa vale, nookhalana ekina ennipelela." Muhoove misika sa itroxeeniyu nnakhala etthu ekina. Vakhalaru wira nookhalana Kristu mmurimani mwanyu, owo ti mwaakiho a musika oolokaxa onsuwel'aka. Owo opakiwe ni mapururu; vathi va mapupha Awe, munrowa okhalaka. Tivo muhixanke mwaha wa itthu iyo, mwaari muKristu.

<sup>80</sup> Masi mwaahikhale muKristu, vekeekhai muri nipuro noowoopiha. Nyuwo khamunsuwela minuutu xeeni murim'anyu onrow'aya omaala otthimaka. Bibilia ohimye wira atthu yaamukhwa mahiku ookiserya, ni eretta ya murima, "Murima w'atthu onoovonya, woova, evitikavitika y'okathi, varyari va ilapo." Nkawehani-tho, annikhwa alopwana imaara muloko, waavikana athiyana; Bibilia khonahimyeke wira murima wa athiyana waanvonya, Owo ohimye wira, "Murima wa alopwana waanvonya." Vekeekhai ti siiso, voolikana.

<sup>81</sup> Nihiku nimoso Oakland, amwaar'aka ni miyo naari weiwo oSan Francisco, etetere ele y'elapo yuulupale yaattikinnye. Nto elapo khupacerya woopa ekhanana ni naatekhume vale, mpakha ipa ottikinyeya, ni ixamaniya omora. Apoola aalupale a ettheku khunawela osulu *siisaale*, ni mwiixi mwemmo, ahiiso exile, enakhaleru yaari xeeni, sikhuma mapuro yaawo. Nto atthu yaatthimakela mphironi, ekhuwelaka. Miyo kuupuwela, "Enrowa okhala exeeni okathi Apwiya vekeekhai anrwaaya?" Makhuru a eviinyu, enatthikela, ahelaka eviinyu aya, muxitantini, etumihaka. Athu yaaniirwa othuma. Mulopwan'owo khaakhanle otumihaka ahaakhanle mutthu wira othume. Ti yeeyo.

<sup>82</sup> Ti, hiyo n'ale oottheke. Mukihiye kooleeleni, munna. Miyo ka mutthu a wAmerika, ni kinnimpheenta elapo aka. Masi elapo ela ya khalayi yoophimmwa vapalansani, khuphwanyiwa ehaleelaka. Eyo enoowina, voolikana ntoko kiryaaka murumeyi

ottuli wa plataforma ela ohiy'ula. Vano miyo kinihimya eyo wira kiphwanye ecalelo ni Muluku. Miyo kinihimya okhala wira Muluku onihela vamurimani vaka wira kihimye. Nto etthu yooreera nyuwo wira okhala oolikana wa Orwa w'Apwiya.

<sup>83</sup> Vano nwaamini Yaawo, nwaamini Yaawo. Vano, moolumo othene kaakhanlyaaka ohimyaka, khiyaarowa ohimya hat'etthu wa ele Yesu aarow'awe ohimya. Masi nyuwo munnisuwela vatthu vamphwanyaney'aka, ni nikhuru nla n'atthu ohiy'ula? Wala koothikileiha, kootaphulela voohiloka etthu, wala koohimya Ekeekhai. Vano vakhala wira Yesu Kristu oohihimuwa mw'alipa-ookhwa, ni, oolaiherya wira, itthu imosaru Owo siiraawe wira nave-tho hiyo namwiira, ni kinnihimyaka, okhuma kiryeene mwanamwane. . .

<sup>84</sup> Miyo nkaarina miyeeri muloko ni mithanu na miraru, wona waka, masi oohivikana miyaakha miili, mwa khula enamuna, okathi woonalyaaka yoowoona aka yoopacerya. Ti, enniireyaka, makhalelo aka othene. Atthu va mutapernakulu, annisuwela eyo. Vakhalaru wira kiri vaava, khiivo hata emaara emosa etonko aya ovonyeya. Ni khenkhalakhala evonyeyaka, okhala wira Mulukuu. Ennirowaka mulaponi mothene, muhakalaliho muulupale onnivarelaka. Nto vano, ni mahala a Muluku, miyo kiri mwa emilyawu aka yaneeili sa minepa, vamuthukumanoni vaka yoomi, kaaruuhaka wa Pwiya Yesu. Emilyawu yaneeili, ti yeeyo. Nto muupuwele paahi imilyawu sikina sikhumme, Oral Roberts, ikesukesu iye sothene sipantte okhuma mwa etthu yeeyo, khukelela ohoolo, imaara ikonto ikonto sene, mpakha molumwenkuni mothene okhanlyaaya muhakalaliho muulupale wa Owerya wa Muluku, oneetta. Nto xetwani onootaphula inamuna sothene sa itthu soowootha, wira ovirikanye Yeeyo. Masi eekeekhai, Masu a Muluku eekeekhai anoorowa mpakha woomalelani. Awo khankhalakhala evonyaka! "Miyo Apwiya kihaala. Miyo kinoonaaniha othana n'uhuyu, wira ohikhale mutthu onikaakha mmatatani Mwaka."

<sup>85</sup> Vano, ohiy'ula, koohimya wira Kristu oohihimuwa mw'alipa-ookhwa. Owo mmosaru nsana, olelo, ni mahiku othene. Vano, Apwiya yooreeriheni. Awo yaira-ru yeeyo, nto nyuwo mwa. . .Mwaaminiki vale, Muluku ooreeriheni. Mmuvekele Yoowo, nto, Owo arwaaru vanlakani. Kristu arwa vale vaplataforma va! Va ori mutharamulo. Vakhala wira Yesu Kristu, Mwaana a Muluku, onookhumelela va vaplataforma, ni wira itthu imosaru Owo siiraly'awe okathi waary'awe muumu elapo ya vathi, nyuwo munoomwaamini Yoowo?

<sup>86</sup> Nkanweheni Yoowo, orwaka Emawusi, moota aximiravo ale, omeiyaawe. . .Okathi Owo omeiyaawe mukatthe ole, Owo ahiira etthu vale ahaakhanle hata mutthu aawerya wira. Yaari etthu emosa Kristu paahi aawery'awe wira. Nto awo yaahisuwela.

<sup>87</sup> Vano Owo aira-ru etthu emosaru va, ele Kristu paahi onweryaawe wira; kahi etthu emosa yoowoothiwa, masi etthu emosaru Owo iiraly'awe; vano mmwaamini Yoowo, mmwaakhele Yoowo, mmwaamini Yoowo, mumphenteke Yoowo, mmurumeeleke Yoowo.

<sup>88</sup> Mukihiye kooleleni, muhitakanihe ekereja paahi vano. Eyo khenrowa ovara etthu. Muhaana oyariwa vasya. Kahi wuukhuleya woopakiwa; kahi etthu yaamukhaani muhimmye-anyu, "Ahe, miyo kaahikhuwela. Koolavula ilavulelo. Miyo kiihira *ela*," kahi yeeyo. Okathi vekeekhai mmurimani mwanyu, Etthu enrwaaya wira yoorukunxeni, nto nyuwo khukhala yoopattuxiwa esya mwa Kristu Yesu; nyuwo moomwaakhela Mutthu, Kristu Yesu; okathi itthu sa khalayi sinkhwaaya, nto itthu isya khuyariwa vasya; munookhaliha itthu oratteene, mwiirakaanyu vooanara; munimwaaphenta awanani inyu, munimwaavekelela ale aniwootheryani; owo p'ukathi munkhalaanyu muKristu. Mwiri onsuweliwa ni muhokorokho oniimaaya.

<sup>89</sup> Apwiya yooreeriheni vano, nuuramihaka muru ahu. Kinrowa onvekela munna orowa vapiyaanoni, orumihe voomaleleya, "Meetiku muulupale ori vakhiviru, Yesu ookhupanyerya." Nto nyuwo vate, vano, murina ittikitti sa mavekelo, mwaattamele vamukhora, ninoopacerya mwa okathi vakhani paahi. Nivekele.

<sup>90</sup> Tith'ihu Oottopeliwa a Wirimu. Oh, nsu naka noovolola, miyeeri xexe kilaleyaka, miyo nkireere okhulumuwa mwa nsu naka. Masi kinvekela wira Nyuwo mukikhaliherye naanaano va. Va enookhala yookhumelela ekina yuulupale oTapernakulu Branham. Va onookhala namoona mukina onrowa ovenya mahiku ookiserya, Nihiku na Olamuliwa. Anci-ene yeemenle mpaani ni vate, ohiy'ula, anci-ene a awo anootikinihiwa, anci-ene annuupuwela, "Eyo ekeekhai, wala kehiyo ekeekhai?"

<sup>91</sup> O Tiithi Ohinimala ni Oottottopeliwa, hiyo ninvekela wira Nyuwo vano munooniherye ophenta Wanyu, mukhumelelaka va ni okhaliha Masu Anyu ekeekhai. Miyo koolavula sa Masu Anyu, ntoko Nyuwo saamwiirenly'anyu, Nyuwaano, Keleofa ni mpatthani awe, erowasaka Emawusi. Nto neettaka, Pwiya, okathi oneettaahu mukwaha, Nyuwo mulavule ni hiyo mwa Masu Anyu. Nto vano murwe eriyari ahu! O Kristu Muulupale, murwe eriyari ahu, mulipiherye Masu Anyu okhala eekeekhai, ni mooniherye Mukhalelo Anyu vaava ohiy'ula. Ntoko, hiyo atthu oohaawa ni oohiphwanela nnihimyaahu wira n'anatampii ni oohiphwanela itthu iya, masi ninnaamini, Pwiya. Nto ni mahala hiyo ninnikupali iyo, mwa waamini, wira hiyo nihoopowa, ni ana Anyu. Munireerihe vano, Pwiya.

<sup>92</sup> Miyo koosuwela wira Masu Anyu ekeekhai, okathi Nyuwo muhimaly'anyu mwaha wa "profeta muttethe awe, eriyari y'atthu awe." Masi, Pwiya, miyo kinvekela, ohiyu ula paahi,

wira Nyuwo mwaawehe paahi vathi athu, ni mwiisooniherye Mmansinyu emaara ekina nno epooma ela, mwa weetteetta wa Erooho Yoowaarya. O Muluku Ohinimala, munireerihe vano okathi onooweherery'ahuni Nyuwo. Ni mwiire itthu Nyuwo mwiiraly'anyu muhinatthi okhomeliwa, ni Jeffersonville onookhala oohikhalana hat'etthu yo wiikhupanyerya. Masi, hiyo noosuwela wira awo khanrowa okhalana hata ntthyawelo Nihiku nle, wira Nyuwo muhiisooniherya Mmansinyu. Mwa Nsina na Yesu, kinnivekela. Amen.

<sup>93</sup> [Nipuro vahiitthu mufiitani—Mol.]...kahi ele owo onthun'awe wira kivekelele. Nnari, kahiyu kankuru, maana oovonihiwa eyo. Masi owo onthuna wira kivekele mwaha wa mukattiyamiho wa muthana owo orin'awe. Ti yeeyo. Owo mukattiyamiho mmuthanani mwawe. Eyo ekeekhaii? Vano munnaamini wira Owo oohihimuwa mw'alipa-ookhwa? Vano nwehe. Kalavularu ni yoowo vakhani-tho, khino etthu ekina enoohimmwa. Miyo nkisuwenle. Vano, miyo nkaarina hata muupuwelo wa exeeni yaari mulattu anyu. Miyo nkisuwenle vano yaari exeeni. Munnona? Masi ikaravatooro sookaphula, nyuwo munoowerya osuwela etthu Owo ohimmy'awe.

<sup>94</sup> Nrowe nilavule-tho minuutu mmosa paahi, noone sinto Owo onookileela etthu ekina. Kinnimoona muthiyana mmosa ononeya etthu ntoko...Owo muthiyana mukina, n'uyo oninvekelela yoowo. Ni owo ori empa emosa ya muteko wala exipiritali, enikhala ntoko...nlo nipuro na anaanepa. Iwo oMadison, Indiana. Ti—ti—ti—nuunu mmosa nyuwo muninthunelaanyu mavekelo, ori empa emosa ya anaanepa. Nto nyuwo mwaaminiru ni murim'anyu wothene, ni sothene siri mwa nyuwo, Muluku onoovuluxa ni onoovoniha muthana anyu ni wookhalihani mukumi. Munnaamini yeeyo vano? Vaareera, murwe va.

<sup>95</sup> Tithi Oophenteya a Wirimu, hiyo ninvekela wira mwa Nsina na Yesu Kristu, wira Nyuwo munvonihe muthiyana'ola, ni mmukhalihe mukumi. Ni munvahe eparakha yeela. Ni kinvekela wira omoriwa ikharari na Muluku okhale mwa yoowo, ni onvonihe, ni okhale ovuwa wa Nyuwo. Miyo kinvekela mwa Nsina na Yesu Kristu. Amen.

<sup>96</sup> Khino kinoohimya ela. Yookhala ethukumelo enkhuma vale, enkhuma ottuli *nno*. Okathi vakhani paahi, mweemele vaavo minuutu mmosa paahi. Kirooweha wira Waarya iwo ohoohiyani. Aakhala anci-enexa, khareere okithukumanela miyo va. Athu othene anoopurula. Masi kinnoona Eyo erwaaka wa nyuwo. Owo mutthu o...Murina—murina operasawu wa muthiyana onoorwa. Ti yeeyo. Koowoona athu aili wala araru, nto Waarya woottikinyeya ottuli iwe khimukwannya mutth'ule eemenle ottuli iwe. Ti yaawo anvekela yeeyo. Munnona? Ti yeeyo. Ni nyuwo mookhalana, owo mukhalelo wa muhano orina

operasawu wa muthiyana. Ti yeeyo. Vano rowakani mwaakhele openuwa wanyu, ni Apwiya Muluku yoovoniheni. Amen.

<sup>97</sup> Munnitthuna orwa? Muhano, munnimwaamini Pwiya Yesu? [Munna muthiyana oniira, “Ayo, mulopwana.”—Mol.] Munnaamini wira Owo oohihimuwa mw’alipa-ookhwa? Vano, woosuwelani, miyo nkinoosuwelani. Khino siiso kitonko ene owoonani nyuwo mwaari-ene a wenna. Nkisuwenle. Atthu animoorwa n’urowa, miyo nkinkhala va vatapernakulu voophiyerya osuwela. Masi, nyuwo, mwa a mpooma? [“Ayo.”] Nyuwo mwa a mpooma. Vaareera, nto, masi nkinoosuwelani. Masi Kristu onnoosuwelani. Masi Owo akuupululela vale, keemenle-ene va, etthu mukhalenly’anyu va, munimwaamini ni okupali? Ni nyuwo moosuwela wira nkinsuwela etthu nyuwo mukhalenlyaanyu va, nkinuupuwelela. Etthu emosa paahi, khino siiso mutonko ene okoona mpooma, wala etthu siiso, wala—wala etthu siiso. Miyo nkisuwenle. Eyo ti ya Muluku o—osuwela yeeyo.

<sup>98</sup> Ottuli weiwe iwe, nyuwo muntthuna openuwa mukattiyamiho owo wa marupo munikhalananyu? Munnaamini wira Pwiya Yesu onimookhalihani mukumi? Mwaaminiki vale, munoowerya waakhela.

<sup>99</sup> Mukina onihaaxeya ni ohaalikeleya oratteene irukuruku sa ephome, okalaanthe ottuli iwo, koowoona awo emukuxaka. Munnaamini wira Apwiya animookhalihani mukumi? Vaareera. Munnaamini ni murim’anyu wothene? Vano munoowerya waakhela ovonihwa wanyu, Muluku oovoniheni okathi ene yoowo. Nyuwo moomukwannya Yoowo. Nyuwo khamukikwannyaale miyo, nyuwo muri imeeturu thanu na xexe wa miyo. Amen.

<sup>100</sup> Vano munnaamini wira Owo oohihimuwa mw’alipa-ookhwa? Nwehe paahi, ni mukhale mukumi, vano eliinya yeetaka. Oh, ti yoolipaxa nno oJeffersonville! Munnona? Nto muttitthi ntoko ola wothene woorukureryakani, atthu othene! Yesu aahinvara mutthu ntata, khimukumiherya ota wa muttetthe, emaara emosa.

<sup>101</sup> Vano nkawehani epantt’ila nno, munna, okathi vakhani paahi. Mwaamini wira Pwiya Yesu ori vaava wira ookhaliheryeni. Munihaaxeya ni mukattiyamiho ori wookiseryani wa nrupo, ni tothoro ohoomwaleyani. Ni oohimenryeni wira aari munamuluku. Kinniwoonani nave-tho mutthunaka weetta murukureryaka empa, ni munrowa voopisaxa. Nyuwo murina wiipa makhonyokhonyo. Eyo ti SIISO ANIHIMYA T’APWIYA. Tothoro ohimnye wira muhaana wooperariwa. Eyo ekeekhaii voolikana. Vano koomoona owo olepa epaphelo ele yaamukhaani oskritooryu wawe: Rebekah Baker, 509 Ephiro Graham. Eyo ekeekhaii voolikana. Eyo ti oskritooryu wawe, voolempwa. Ti yeeyo. Munnaamini? [Munna muthiyana oniira, “Ayo, mulopwana.”—Mol.] Vano



munoowerya waakhela ovona wanyu. Mwa Nsina na Pwiya Yesu Kristu, muthiyan'ola aakhele ovonihiwa wawe. Amen. Muluku ooreeriheni, muhano. Rowakani, mwaaminiki vano. Mmwaamini Muluku.

Vaakhanle wira mwaamuwerya osuwela Mukhalelo w'Apwiya!

<sup>102</sup> Vano muhan'ola eemenle va, wira nyuwo khino... Miyo nkinoosuwelani, mpakha sinsuwel'aka. Nyuwo khamunkisuwela, ni miyo nkinoosuwelani. Eyo ekeekhai? Vaareera. Vano nyuwo mwa mutthu ohinikisuwela, ni miyo nkinaasuwela. Ni miyo nkaamusuwela muhano mukina. Masi muhan'ola mmalapo voomalela, mpakha sinsuwel'aka. Eyo yaari ekeekhai, nvenxe ntata nanyu, muhano. Emaara ahu yoopacerya, otoko okumana nookhalaru.

<sup>103</sup> Va ori muthiyana ni mulopwana. Elatarato vooreera paahi ya Yohani Oowaarya 4, vaavo muthiyana mmosa ni Mulopwana mmosa yaakumanse-aya; nto muthiyana aari muSamariya, Yesu aari muYuta. Nto awo khupacerya ovaanela mmosa ni mukhw'awe, vano Yesu khuupulula isiiri sa mmurimani mwawe khimusuweliha vatthu vaari mulattu awe. Vano, vakhala wira Owo ti Yesu mmosaru olelo, Owo onniwerya ovara muteko mmosaru olelo.

<sup>104</sup> Muthiyan'ola anvenxerya-ru ntata Muluku, kahi olapha (okhala wira, hiyo khinnaamini wira siiso), ovenxa ntata nawe paahi mwa exariya, ni nawaka, wira khinnatoko woonana mmosa ni mukhw'awe khalayi, ni khaninsuwela hat'etthu ya mmosa ni mukhw'awe. Munooovenxa ntata nanyu, muhano? Eyo eri vo. Owo khonatoko okoona, ahiiso miyo nkinatoko omoona owo, ni owo mmalapo voomalela. Vano yakhala . . .

<sup>105</sup> Mukhalelo w'Apwiya Yesu ori vaava. Vakhala wira muthiyana onoowereiwa, miyo nkaarowa owerya onvonihia. Owo oovonihiwa; Kristu oonvonihia okathi Owo omukhwenlyaawe. Munnaamini yeeyo? Masi vakhala wira owo eemenle va vano, ni . . .vatthu keemenlyaaka, ni Owo aamurowa, aamuwerya omusuweliha, wala wira etthu wira ovenxe waamini wawe wira omaliherye! Vano, owo pooti eemenle-ene va mwaha wa mukattyamiho wa musurukhu. Owo pooti eemenle-ene va ni mukattyamiho wa vatthokoni. Owo pooti eemenle-ene va, okhwaaka ni kankuru. Khino owo eemenle va ni elapaha. Miyo nkisuwenle. Nkinwerya wooleelani.

<sup>106</sup> Nto vano nyuwo mwatthuna wiikhaliha nipuro naka, murwe va mukhale nipuro naka, munoorwa vooreera. [Munna Branham onoomaala—Mol.] Vekeekhai. Nnakhala miyo nkisuwenle, nnakhala nkaarowa wira. Masi Muluku a Wirimu onnisuwela. Munniwerya wiiwa saana vano?

<sup>107</sup> Nto vakhala wira Kristu onoopaka etthu emosaru va, Ekeekhai ehinivonya, siiso Owo sihihimunwe-awe mw'alipa-

ookhwa, ni khooniherya wira Owo ti Yesu mmosaru yoole aalavunle ni muthiyana veehimeni, akavi mu anrowa wira, “Miyo kinoomwaakhela Owo naanaano va ntoko Mpenuxa aka, wala etthu p’itthu entthun’aka”? Nvenxe ntata, mwiire, “Miyo kinoomwaakhela Owo airaru yeeyo.”

<sup>108</sup> Muthiyana ni matata awe osulu, hiyo khinnatoko okumana. Apwiya enivahe, ti mavekelo aka. Vano muhan’owo onkhala ntoko weetta okhumaka wa miyo; muthukumano waweryaru wiiwa nsu naka. Kinnimoona mutthu eemenle. Kahi ya yoowo, vanci-ene. Owo oninkelela mutthu mukina, ni owo muhano mmosa mutokweene. T’ame awe, owo onaavekelelaawe. Eyo ekeekhai. Eyo arina ituphelo sikhaani sa murima, ntoko, waatthimaka murima vakhani. Awo khanwerya orupa ohiyu. Kahi yeeyo? Nvenxe ntata nanyu yaari-ene ekeekhai. Nto muhan’owo kahiyo a elapo yeela. Muthiyana’owo t’ottaiwene ni wenno. Muhan’owo t’a oGeorgia. Eyo ekeekhai voolikana. Ni nyuwo mwa a oGeorgia. Ni nyuwo munnitthuna nivekelo mwaha wa niitho nanyu, nave. Ni munikhala oochoona mmaithoni mwanyu. Ni eyo ekeekhai. Munnaamini wira Muluku onimookhalihani mukumi? Eyo yakhala ekeekhai, nvenxe ntata nanyu. Vaareera.

<sup>109</sup> Vano munnaamini? Vano mmwaamini Muluku. Kinvekelelaka, mwiivekelele mmansinyu iwo, ni mmwaamini Muluku. Owo ori vaava, ookhala mapuro othene.

Murwe va, munna.

<sup>110</sup> Moopoli Oottotopeliwa, kinvekela wira, mwa Nsina na Kristu, wira Nyuwo munvahe muthiyana’ola entthunaawe. Owerya wa Muluku Owerya sothene okhale mwa yoola, ni wira avonihwe ni aakhele khula etthu owo ovekenly’awe. Miyo kinvekela eparakha ela mwa Nsina na Yesu. Amen.

<sup>111</sup> Vano rowakani, mutthapaka, ni otteeliwa murima. Ni mwaamini, munna, ni nvonihwe. Vaareera.

<sup>112</sup> Miyo nkisuwelanxe, masi kookupali wira kinnimusuwela muthiyana’ola. Kookupali wira nyuwo mwa a oGeorgetown, okhala wira miyo ki...Nyuwo khamuhiyo mmusi a Munna Arganbright? Vekeekhai, vano mureeriho ola, ti woovirikana. Nyuwo munnisuwela wira yookhala evirikanelo naanaano va. Kaalavulaka ni nyuwo nipuro nikina; ti yoovirikana naanaano va. Nyuwo muhoona moonelo mmosa wooreera saana, ntoko. Eyo Erooho Yoowaarya. Nyuwo khamukhanle va mwaha wa nyuwaano. Nyuwo muri va mwaha wa mutthu mukina, ni owo mwanamwane mwaamuthiyana oophiyaka miyaakha mixexe wala mithanu. Owo orina eretta ya esyo, ni onkhala epantte onkela epheyo wa Indiana. Eyo ekeekhai. Eyo erinaanyu mmatatani mwanyu, munveleliherye yoowo, nto onoovonihwa. Mwaamini ni murima wothene vano, ni mwaakhele evekenlyaanu, mwa Nsina na Kristu.

“Mwaaweryaka waamini, sothene sinniweryaneya!”

113 Va ookhala muhano okhanle mmalapo wa miyo. Miyo nkinoosuwelani, nkinatoko owoonani kookhalaru. Hiyo n'amalapo mmosa ni mukhw'awe, miyaakha sinci-ene soorakamelana; khino sinci-ene, niyariwe imiilya sinci-ene soorakamelana. Miyo nkinoosuwelani, nkinatoko owoonani. Masi Yesu Kristu onnoosuwelani.

114 Etthu emosa ehiraneya vamuthukumanoni; mulopwana mmosa ohoorwa vakhiviru ni miyo. Ola okalaanthe va, vaava va, mwaamukokho vantekhuni. Munnaamini, mulopwana? [Munna oniira, “Ayo.”—Mol.] Vano Kristu onnoovonihani ni onnookhalihani mukumi! Amen.

115 Eyo t'inamuna yo wira, mwaamini! Owo okwanyale exeeni? Miyo nkinatoko omoona mulopwan'owo; masi oovonihiwa vaavale. Owo omukwanyale Pwiya Yesu Yoowo omphwanyaneya vaava. Mukumihe ohaamini iwo mwa nyuwo! Muliyaale miyo okhala William Branham. Munwehe Yesu Kristu, Owo ti Ole ori vaava. Miyo kinnitharamula waamini wanyu, mwa Nsina na Kristu, wira mukiliyale miyo; ni mwaamini wira ola Pwiya Yesu va, moone etthu wiiraneya. Nkincala nipuro xeeni mury'anyu mpaani mu.

116 Vano va ookhala mwaamuthiyana mmosa. Miyo nkinatoko omoona. Owo t'owunnuwa okivikana miyo. Owo, miyo nkisuwenle t'ani uwo, otthu onikhum'awe, hat'etthu ya yoowo. Miyo ka mmalapo voomalela wa yoowo. Masi Kristu onnimusuwela.

117 Owo akuupululela vale etthu mukhalenly'anyu va, munimwaakhela ni waamini? [Munna muthiyana oniira, “Vekeekhai.”—Mol.] Mwaarina moonelo wootikiniha minuutu vakhani sivinre, okathi olavunly'aka etthu, kahi siiso? Aari muhima anyu ori empa y'anamukhw'anepa oMadison, Indiana. Ti yoolikana. Maana, muthiyana mukina eemenle va, ni nyuwo mweemenle vaavo nwehaka epantt'ila nno. Nto yoowoona, nyuwo mwaamwaamini okathi oruuly'anyu. Eyo ekeekhai voolikana. Ti yeeyo yiirale. Nto etthu mukhalenlaanyu va ohiy'ula, okhala wira nyuwo murina eretta ya murima. Munoomalaru okhalana etuphelo ya murima. Eyo ekeekhai voolikana. Ni kinnoona vano, kiwehaka mwa yoowoona, elapo ele ya matumuxa. Nyuwo mwa a nipuro nlo nno oIndiana w'okuusini. Nyuwo mwa a vakhiviru wa oCorydon, mukhanlyaanyu a weiwo. Mutthikele owaani, mookhala mukumi. Yesu Kristu onnookhalihani mukumi. Eyo ti SIISO ENIHIMYA EROOHO YOOWAARYA.

118 Mwaamini, ni mwaamini. Muhihoverye. Mwaamini paahi. Munniwerya osuwela ekhalelo mapuro othene ya Pwiya Yesu? Moota eryaaya yoothamaleya! Mulattu ene xeeni?

<sup>119</sup> Va vanloothoni, kinnoona yoowoona. Meetiku khonsuwela sinto kankuru wala elapaha. Ti yeeyo. Masi mwaaminiru, moovonihiwa, khula enamuna. Waamini wanyu woowoopolani. Muroweke.

<sup>120</sup> Eyo eri vo. Ekhalelo mapuro othene ya Muluku mukumi! Miyo kinnitharimula waamini wanyu. “Mwaaweryaka waamini!” Vano, Owo oohihimuwa mw’alipa-ookhwa. Owo ori vaava ni hiyo. Owo ti Yoowo! Iyo t’itthu sene Owo iiralyaawe okathi Owo aary’awe muumu elapo ya vathi. Miyaakha ikonto piili soovira, Owo nlelo mukumii, ni Owo onkhala voohimala. Mwaamini paahi, mwaamini.

<sup>121</sup> Miyo nkinoosuwelani, muhano. Miyo nkinatoko owoonani kookhalaru, nkinsuwela hat’etthu ya nyuwo. Eyo ekeekhahi, kehiyo? Yesu Kristu onnoosuwelani. Muluku akuupululela vale etthu mweemelenly’anyu va, munoomwaamini Yoowo, ni munimwaamini wira ka profeta Awe? Owo aira-ru yeeyo, moosuwela wira Etthu yookikhaliha oottikittheliwa. Nyuwo mwaahaana osuwela wira ti Yeeyo. Vano miyo kaahimye wira, “Kinrowa owiixaatheryani matata aka, nvonihiwe,” nyuwo mwaahaana ehaakhi yo ohoverya. Masi vakhala wira Muluku onookileela etthu munsuwel’anyu wira ekeekhahi, vano nyuwo moosuwela sinto ekeekhahi wala nnari. Eyo ekeekhahi? [Munna muthiyana oniira, “Ti yeeyo.”—Mol.] Owo mukattyamiho wa athiyana. Wooperariwa, kinniwoonani mukhumaka vameesa va operasawu, ni etthu emosa yootteela wiitho wanyu, masi khawiireiye oratta-ene. Ti yeeyo. Masi, xetwani uwo oroomwiipitha meetiku, masi khonwerya omwiipitha Muluku. Muroweke owaani, mukhale mukumi, muhano, Yesu Kristu ohooonihani ni ohookhalihani mukumi.

Mwaaweryaka waamini!

<sup>122</sup> Miyo ka mmalapo wa nyuwo, muhano. Nyuwo munnaamini wira Yesu Kristu, Mwaana a Muluku, ori vaava? Munnaamini wira Owo onimookhalihani mukumi? Tiyapeeti kehiyo hat’etthu, wira Muluku onvonihe. Munnaamini wira Owo onimookhalihani mukumi? Vano rowakani owaani mwaakhele ovonihiwa wanyu, mwa Nsina na Yesu Kristu, Mwaana a Muluku. Amen.

Rwaani nno, muhano. Munnaamini?

<sup>123</sup> Vano muhiye wuupuwela eyo ottuli iwo! Kuhiyo “osoma muupuwelo.” Khamukhanle wiihuluxa yeeyo vano! Mukihiye kiwooniheni.

<sup>124</sup> Miyo nkimmusuwela muthiyan’ola. Mukiixaatherye matata, muhano. Muluku akuupululela vale etthu eri mukattyamiho anyu! Miyo kiwehaka epante *ila*, nyuwo munnisuwela wira nkinsoma muupuwelo anyu. Muluku akuupululela vale etthu eri mukattyamiho anyu, munimwaamini wira Yesu Kristu Mwaana a Muluku, ni wira miyo ka murumeyi Awe? Munimwaamini, nvenxe ntata nanyu. Murina mukattyamiho w’athiyana,

mukattyamiho wa athiyana. Ti yeeyo. Mwaahikhalana; khamurina vano. Moovonihiwa. Rowakani, mutthapeke n'utteeliwa murima.

<sup>125</sup> Murwe, mulopwana. Mukattyamiho owo wa khalayi wa esyo, ni etthu enoohaaxakani. Munnaamini wira Muluku onimookhalihani mukumi? [Munna oniira, "Ayo."—Mol.] Woovonihani yeeyo? Vano, mwa Nsina na Yesu Kristu, mwaakhele openuwa wanyu, muroweke, muhakalalaka. Amen. Muluku ooreeriheni, munna.

Mwaamini!

<sup>126</sup> Ehaali anyu, muhano? Khimwaatthuna orowa, olya yoolya yooreera tho ntoko saalyaak'anyu? Munnikhalaka oowuukhuleya saana, kahi siiso? Yookumiherya nikhwatta munapwiipwini mwanu. Murowe, mwakuxe ephaawu anyu mukhuure, Yesu Kristu ohoovonihani. Rowakani, mutthapaka.

<sup>127</sup> "Nyuwo mwaaweryaka waamini!" Mmwaamini Muluku. Munnaamini? Kristu, mukumi oowerya sothene ori vaava naanaano va, wira anvonihe khula mutthu mu.

<sup>128</sup> Okathi vakhani paahi. Ottuli wu muliinyani, okilaanthe vaava va, mmiravo mmosa. Waamini wanyu ti wuulupalexa ovikana suupuwel'anyu okhalana, mwan'aka. Nyuwo mwaarina mukattyamiho wa murima, khimwaarina? Yaari yeeyo, nvenye mweemele. Yesu Kristu ohoovonihani, mwan'aka. Nyuwo mwa mukumi. Rowakani, mukhale mukumi.

<sup>129</sup> Munnimwaamini Yoowo? Mmwaamini Muluku.

<sup>130</sup> Va ookhala mulopwana mmosa ohimmusuwelaaka. Hiyo n'amalapo mmosa ni mukhw'awe. Kookupali wira mulopwan'ola opatisiwe voosiisu yoola. Masi miyo nkinoosuwelani, nkinnuupuwela hat'etthu ya nyuwo. Eyo ekeekhai? Vakhala wira Yesu Kristu onookuupululela miyo etthu mukhalenlyaanyu va, nyuwo munookupali?

<sup>131</sup> Akavi vamuthukumanoni anrowa waakhela naanaano va? "Mwaaweryaka waamini!" Mwaamini paahi. Muhihoverye.

<sup>132</sup> Mulopwan'owo orina mukattyamiho wa esapala. Ti yeeyo. Ni kinnoona wira munikhala...Owo mukattyamiho wa mmavoro, nave. Ti yeeyo. Yaari yeeyo, muvele ntata nanyu. Ni kinnoona etthu emosa yooriipela yeemenle-ene eriyari ya nyuwo ni muthiyana; t'amwaar'inyu. Munaavekelela yaawo. Awo anatampii, ni muntthuna wira awo akhale muKristu. Eyo ti SISO ANIHIMYA T'APWIYA. Ti yeeyo. Murowe, mwawiixaatherye matata anyu, mwaavekelele, wira Muluku Wirimu uupulule otthuneyaxa wa itthu iya sikhlanle s'ekeekhai.

<sup>133</sup> Munnaamini? Munnaamini wira Muluku onimwiira? "Mwaaweryaka waamini!" Miyo kinnitharimula waamini wanyu. Ottuli iwo, khula nipuro mury'anyu, nwehe mukhale mukumi! Mmwaamini Muluku, vatthu ti vatthu

mury'anyu. "Mwaaweryaka waamini, sothene sinniweryaneya." Mwaaweryaka waamini! Nwehe, nwehe epantt'ila, nvekele.

Nyuwo muniira, "Muniweha exeeni, Munna Branham?"

<sup>134</sup> Rebekah, mutthikele nno vakhani, oophentiwa. Mweemele vaavo mury'anyu. Vo ori mwaaruusi aka, yoowo nihiku nlo onrowa okhala profeta muthiyana, nave. Muhan'ole eemenle vale vakhiviru ni nyuwo, oophentiwa, owandre expaheyo yootteela, onihaaxeya ni mukattiyamiho wa nikusaku. Nvenxe ntata nanyu, ahiiso nvenye mweemele, muhano. Nyuwo munvekela wira Muluku owiihaneni, wira kiwiihaneni. Eyo ekekhaii? Mmuhiye mwaaruusi aka owiixaatheryeni matata vo.

O Muluku Ohinimala, mwa Nsina na Yesu Kristu, miyo kinnimpwapwela xetwani uwo onimuhaaxa muthiyany'owo. Ni okumihiwe, mwa Nsina na Kristu. Amen.

<sup>135</sup> Oh, nittotopeliwe Nsina n'Apwiya! Pwiya Yesu aisooniherye Mmansawe, nave. Munnaamini wira Owo ori vaava? Vano mukihye kooleleni, khula mmosa a nyuwo, naanaano va, mwaaweryaka vale waamini, Yesu Kristu onnimukhaliha khula mmosa a nyuwo mukumi, naanaano va. Vakhala wira moolumo aka t'ekeekhai *va*, t'ekeekhai *iwo*. Mwaira-ru etthu enooleel'akani wira mwiire, munoowerya ovonihiwa naanaano va. Munnaamini? Vano mwixatheeryane matata mmosa ni mukhw'awe. Mwixatheryane matata paahi mmosa ni mukhw'awe, mpaani wala vate. Muhihoverye! Kihiiwa erooho yoottiya maaru okhuma. Owo ori vaava, Kristu ohihimunwe!

<sup>136</sup> O Muluku Ohinimala ni Oottotopeliwa, mwa Nsina na Pwiya Yesu, miyo kinnivirikanya khula erooho yootakhala, mwa Nsina na Kristu Apwiya, wira ekhume nipuro nla, ekhume mw'atthu ala. Ni wira Erooho Yoowaarya yuulupale vano yaapatise atthu othene mu, ni waamini wuulupale wira yaamini.

<sup>137</sup> Oh, Satana, nyuwo xetwani, moonootooha voophiyerya. Kristu oohihimuwa, Owo oniphwanyaneya vaava ni ihulelo sa mookhwaani ni omooroni siryeene ni Yoowo. Owerya w'ovoniha woolinvwa. Nto hiyo ninnoovirikanyani, mwa Nsina na Yesu Kristu, Mwaana a Muluku mukumi, wira nyuwo mukhume mw'atthu ala. Mwaakhume, Satana, wira awo arowe akhale akumi.

<sup>138</sup> Mwaaminikuru ni murim'anyu wothene, wira Yesu Kristu ohoovonihani, nvenye mweemele, ni mwaakhele Owerya w'Emuluku w'ovoniha wa Muluku Oowerya sothene. Ti yeeyo! Avuwihwe Apwiya! Attotopeliwe Apwiya! Nyuwo, khula mmosa, oovonihiwa. Nvenye mweemele, mmuttotopele Muluku! Amen! Nittotopeliwe Nsina n'Apwiya! Nrowe nimuttotopele Yoowo, nivexaka matata ahu ni omuttotopele Yoowo. Attotopeliwe Mwaana a Muluku mukumi! Amen!



*NTO MAITHO AYA YAAHAATTHUKUWA*  
*VANO KHUMUSUWELA OWO* EMK57-0421E  
(And Their Eyes Were Opened And They Knew Him)  
ETTHARANELO MIHAKALALIHO SA PAASIKHA

Mutthak'ola wa Munna William Marrion Branham, opaceryawene olaleeriwe ni Enkelesi Ettimunku ya Paasikha ohiyu, mahiku yeettaka 21 mweeri w'Abril, 1957, oBranham Tabernacle oJeffersonville, Indiana, wAmerika, okuxiwe wo okaravariwa mufitani ya makineti khulempwa wothene ni nntaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2023 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitemihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanelle, xontte mulavule ni:

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)